

重刊道藏輯要

長春真人西遊記

門人真常子李志常述

父師真人長春子姓邱氏名處機字通密登州棲霞人未冠出家師事重陽真人既而住磻溪龍門十有三年真積力久學道乃成暮年還海上戊寅歲之前師在登州河南屢欲遣使徵聘事有齟齬遂已明年住萊州昊天觀夏四月河南提控邊鄙使至邀師同往師不可使者攜所書詩頌歸繼而復有使自大梁來道聞山東爲宋人所據乃還其年八月江南大帥李公彭公來請不赴爾後隨處往往邀請萊之主者難其事師乃言曰我

道藏輯要

西遊記

一

胃集三

之行止天也非若輩所及知當有留不佳時去也居無何成吉思皇帝遣侍臣劉仲祿獻虎頭金牌其文曰如朕親行便宜行事及蒙古人二十輩傳旨敦請師躊躇間仲祿曰師名重四海皇帝特詔仲祿踰越山海不限歲月期必致之師曰兵革以來彼疆此界公冒險至此可謂勞矣仲祿曰欽奉君命敢不竭力仲祿今年五月在乃滿國兀里朶得旨六月至白登北威靈得羽客常真論七月至德興以居庸路梗燕京發士卒來迎八月抵京城道眾皆曰師之有無未可必也過中山歷真定風聞師在東萊又得益都府安撫司官吳燕蔣元始得其詳欲以兵五千迎師燕等曰京東之人聞兩朝議和眾心稍安今忽提兵以

入必皆據險自固師亦將乘桴海上矣誠欲事濟不必尔也從之乃募自願者得二十騎以行將抵益都使燕元馳報其師張林林以甲士萬郊迎仲祿笑曰所以過此者爲求訪長春真人君何以甲士爲林於是散其卒相與接轡以入所歷皆以此語之人無駭謀林復給以驛騎次濰州得尹公冬十有二月同至東萊傳皇帝所以宣召之旨師知不可辭徐謂仲祿曰此中艱食公等且往益都俟我上元醮竟當遣十五騎來十八日卽行於是宣使與眾西入益都師預選門弟子十有九人以俟其來如期騎至與之俱行由濰陽至青社宣使已行矣問之張林言正月七日有騎四百軍於臨淄青民大駭宣使逆而止之今未

道藏輯要

西遊記

二

胃集三
卷之十一

聞所在師尋過長山及鄒平二月初屆濟陽士庶奉香火迎拜於其邑南羽客長吟前導飯於養素庵會眾僉曰先月十八日有鶴十餘自西北來飛鳴雲間俱東西去翌日辰巳間又有數鶴來自西南繼而千百焉或頡或顛獨一鶴拂庵盤桓乃去今乃知鶴見之日卽師啟行之辰也皆以手加額留數日二月上旬宣使遣騎來報已駐軍將陵艤舟以待明日遂行十三日宣使以軍來迓師曰來何暮對以道路榛梗特往燕京會兵東備信安西備常山仲祿親提軍取深州下武邑以關路構橋於滹沱括舟於將陵是以遲師曰此事非公不克辦次日絕滹沱而北二十二日至瀘溝京官士庶僧道郊迎是日由麗澤門入道

士具威儀長吟其前行省石抹公館師於玉虛觀自爾求頌乞
名者日盈門凡士馬所至奉道弟子以師與之名往往脫欲兵
之禍師之道應及人如此宣撫王巨川楫上詩師答云旌旗獵
獵馬蕭蕭北望燕山度石橋萬里欲行沙漠外三春遽別海山
遙良朋出塞同歸鴈破帽經霜更續貂一自玄元西去後到今
無似北庭招師聞行宮漸西春秋已高倦冒風沙欲待駕迴朝
謁又仲祿欲以選處女偕行師難之曰齊人獻女樂孔子去魯
余雖山野豈與處子同行哉仲祿乃令曷刺馳奏師亦遣人奉
表一日有人求跋闔立本太上過關圖題蜀郡西遊日函關東
別時羣胡皆稽首大道復開基又以二偈示眾其一云雜亂朝
道藏輯要
西遊記
三
胃集三
還暮輕狂古到今空華空寂念若有若無心其二云觸情常決
烈非道莫參差忍辱調猿馬安閑度歲時四月上旬會眾請望
日醮於天長師以行辭眾請益力曰今茲兵革未息遺民有幸
得一覩真人蒙道應者多矣獨死者冥冥長夜未沐薦拔遺憾
不無耳師許之時方大旱十有四日既啟醮事雨大降眾且以
行禮爲憂師於午後赴壇將事俄而開霽眾喜而歎曰一雨一
晴隨人所欲非道高德厚者感應若是乎明日師登寶玄堂傳
戒時有數鶴自西北來人皆仰之焚簡之際一簡飛空而滅且
有五鶴翔舞其上士大夫咸謂師之至誠動天地南塘老人張
天度子眞作賦美其事諸公皆有詩醮竟宣使劉公從師北行

道出居庸夜遇羣盜於其北皆稽顙以退且日無驚父師五月
師至德興龍陽觀度夏以詩寄燕京士大夫云登真何在泛靈
植南北東西自有嘉碧落雲峰天景致滄波海市雨生涯神游
八極空雖遠道合三清路不差弱水縱過三十萬騰身頃刻到
仙家時京城吾道孫周楚卿楊彪仲文師謂才卿李士謙子進
劉中用之陳時可秀玉吳章德明趙中立正卿王銳威卿趙昉
德輝孫錫天錫此數君子師寓玉虛日所與唱和者也王觀逢
辰王直哉清甫亦與其遊觀居禪房山之陽其山多洞府常有
學道修真之士棲焉師因挈眾以游初入峽門有詩云入峽清
遊分外嘉羣峯列岫戟查牙蓬萊未到神仙境洞府先觀道士

道藏輯要

西遊記

四

胃集三

家松塔倒縣秋雨露石樓斜照晚雲霞卻思舊日終南地夢斷
西山不見涯其地爽塏勢傾東南一望三百餘里觀之東數里
平地有湧泉清冷可愛師往來其間有詩云午後迎風背日行
遙山極目亂雲橫萬家酷暑熏腸熱一派寒泉入骨清北地往
來時有信東泉遊戲俗無爭耕夫牧豎
堤陰讓坐溪邊浴罷林間坐散髮
披襟暢道情中元日本觀醮午後傳符授戒老幼露坐熱甚悉
苦之須臾有雲覆其上狀如圓蓋移時不散眾皆喜躍讚歎又
觀中井水可給百眾至是踰千人執事者謀他汲前後三日井
泉忽溢用之不竭是皆善緣天助之也醮後題詩云太上弘慈
救萬靈眾生薦福藉羣經三田保護精神氣萬象欽崇日月星

自揣肉身潛有漏難逃科教入無形且遵北斗齋儀法

南斗北斗皆論

齋漸陟南宮火鍊庭八月初應宣德州元帥移刺公請遂居朝

元觀中秋夜有賀聖朝二曲其一云斷雲歸岫長空凝翠寶鑑
初圓大光明弘照巨流沙外直過西天人間是處夢魂沈醉歌
舞華筵道家門別是一般清暗開悟心田其二云洞天深處良
朋高會逸興無邊上丹霄飛至廣寒宮悄擲下金錢靈虛晃耀
睡魔奔迸玉兔嬋娟坐忘機觀透本來真任法界周旋是後天
氣清蕭靜夜安閒復作二絕云長河耿耿夜深深寂寞寒窗萬
慮沈天下是非俱不到安閒一片道人心其二云清夜沈沈月
向高山河大地絕纖毫唯餘道德渾淪性上下三天一萬遭朝

道藏輯要

西遊記

五

胃集二

元觀據州之乾隅功德主元帥移刺公因師欲北行勗構堂殿
奉安尊像前後雲房洞室皆一新之十月間方繪祖師堂壁畫
史以其寒將止之師不許曰鄒律尙且迴春况聖賢陰有所扶
持邪是月果天氣溫和如春絕無風沙由是畫史得畢其功有
詩云季秋邊朔苦寒同走石吹沙振大風旅鴈翅垂南去急行
人心倦北征窮我來十月霜猶薄人訝千山水尙通不是小春
和氣暖天教成就畫堂功尋阿里鮮至自斡辰大王帳下使來
請師繼而宣撫王公巨川亦至曰承大王鈞旨如師西行請過
我師首肯之是月北遊望山曷刺進表迴有詔曰成吉思皇帝
勅真人邱師又曰惟師道踰三子德重多方其終曰雲軒既發

於蓬萊鶴馭可遊於天竺達磨東邁元印法以傳心老氏西行
或化胡而成道顧川途之雖闊瞻几杖以非遙爰答來章可明
朕意秋暑師比平安好指不多及其見重如此又勅劉伸祿云
無使真人饑且勞可扶持緩緩來師與宣使議曰前去已寒沙
路綿遠道眾所須未備可往龍陽乘春起發宣使從之十八日
南往龍陽道友送別多泣下師以詩示眾云生前暫別猶然可
死後長離更不堪天下是非心不定輪迴生死苦難甘翌日到
龍陽觀過冬十一月十有四日赴龍巖寺齋以詩題殿西廡云
杖藜欲訪山中客空山沈沈淡無色夜來飛雪滿巖阿今日山
光映天白天高日下松風清神遊八極騰虛明欲寫山家本來

道藏輯要

西遊記

六

胃集三
六

面道人活計無能名十二月以詩寄燕京道友云此行真不易
此別話應長北蹈野狐嶺西窮天馬鄉陰山無海市白草有沙
場自嘆非玄聖何如歷大荒又云京都若有饑行詩早寄龍陽
出塞時昔有上牀鞋履別今無發軫夢魂思復寄燕京道友云
十年兵火萬民愁千萬中無一二留去歲幸逢慈詔下今春須
合冒寒遊不辭嶺北三千里皇帝舊
兀里多仍念山東二百州窮急漏
誅殘喘在早教身命得消憂辛巳之上元醮於宣德州朝元觀
以頌示眾云生下一團腥臭物種成三界是非魔蓮枝帶葉無
窮勢跨古騰今不柰何以二月八日啟行時天氣晴霽道友餞
行於西郊遮馬首以泣曰父師去萬里外何時復獲瞻禮師曰

但若輩道心堅固會有日矣歟復泣請果何時邪師曰行止非
人所能爲也兼遠涉異域其道合與不合未可必也歟曰師豈
不知願預告弟子等度不獲已乃重言曰三載歸三載歸十日
宿翠峴口明日北度野狐嶺登高南望俯視太行諸山晴嵐可
愛北顧但寒沙衰草中原之風自此隔絕矣道人心無適不
可宋德方輩指戰場白骨曰我歸當薦以金籙此亦余北行中
一段因緣耳北過撫州十五日東北過蓋里泊盡邱垤鹹鹵地
始見人煙二十餘家南有鹽池迤邐東北去自此無河多鑿沙
井以汲南北數千里亦無大山馬行五日出明昌界以詩紀實
云坡陁折疊路彎環到處鹽場死水灣盡日不逢人過往經年

道藏輯要

西遊記

七

胃集三
ノノノ

時有馬迴還地無木植唯荒草天產邱陵沒大山五穀不成資
乳酪皮裘氊帳亦開顏又行六七日忽入大沙陁其蹟有矮榆
大者合抱東北行千里外無沙處絕無樹木三月朔出沙陁至
魚兒灤始有人煙聚落多以耕釣爲業時已清明春色渺然凝
冰未泮有詩云北陸祁寒自古稱沙陁三月尙凝冰更尋若士
爲黃鵠要識修鯤化大鵬蘇武北遷愁欲死李陵南望去無憑
我今返學盧敖志六合窮觀最上乘三月五日起之東北四旁
遠有人煙皆黑車白帳隨水草放牧盡原隰之地無復寸木四
望唯黃雲白草行不改途又二十餘日方見一沙河西北流入
陞局河水濡馬腹傍多叢柳渡河北行三日入小沙陁四月朔

至幹辰大王帳下冰始泮草微萌矣時有婚嫁之會五百里內
首領皆載馬湏助之皂車氊帳成列數千七日見大王問以延
生事師謂須齋戒而後可聞約以望日授受至日雪大作遂已
大王復曰上遣使萬里請師問道我曷敢先焉且諭阿里鮮見
畢東還須奉師過此十七日大王以牛馬百數車十乘送行馬
首西北二十二日抵陸局河積水成海周數百里風浪漂出大
魚蒙古人各得數尾並河南岸西行時有野薤得食五月朔亭
午日有食之既厭星乃見須臾復明時在河南岸蝕自西南其
生自東北其
地朝涼而暮熱草多黃花水流東北兩岸多高柳蒙古人取之
以造廬帳行十有六日河勢遶西北山去不得窮其源西南接

道藏輯要

西遊記

八

胃集三
八〇五〇

魚兒樂驛路蒙古人喜曰年前已聞父師來因獻黍米石有五
斗師以斗棗酬之渠喜曰未嘗見此物因舞謝而去又行十日
夏至量日影二尺六七寸漸見大山峭拔從此以西漸有山阜
人烟頗眾亦皆以黑車白帳爲家其俗牧且獵衣以韋毳食以
肉酪男女結髮垂兩耳婦人冠以樺皮高二尺許往往以皂褐
籠之富者以紅綃其末如鵝鴨名曰故故大忌人觸出入廬帳
須低回俗無文籍或約之以言或刻木爲契遇食同享難則爭
赴有命則不辭有言則不易有上古之遺風焉以詩敘其實云
極目山川無盡頭風烟不斷水長流如何造物開天地到此令
人放馬牛飲血茹毛同上古我冠結髮異中州聖賢不得垂文

化歷代縱橫只自由又西程西北渡河乃平野其旁山川皆秀麗水草且豐美東西有故城基址若新街衢巷陌可辨制作類中州歲月無碑刻可考或云契丹所建旣而地中得古瓦上有契丹字蓋遼亡土馬不降者西行所建城邑也又言西南至尋思干城萬里外回紇國最佳處契丹都焉歷七帝六月十三日至長松嶺後宿松栝森森千雲蔽日多生山陰澗道間山陽極少十四日過山度淺河天極寒雖壯者不可當是夕宿平地十五日曉起環帳皆薄冰十七日宿嶺西時初伏矣朝暮亦有冰霜已三降河水有漸冷如嚴冬土人云常年五六月有雪今歲幸晴暖師易其名曰大寒嶺凡遇雨多雹山路盤曲西北且百餘里旣而復西北始見平地有石河長五十餘里岸深十餘丈其水清冷可愛聲如鳴玉峭壁之間有大葱高三四尺澗上有松皆十餘丈西山連延上有喬松鬱然山行五六月峰迴路轉林巒秀茂下有溪水注焉平地皆松樺雜木若有人煙狀尋登高嶺勢若長虹壁立于柳俯視海子淵深恐人二十八日泊窩里朶之東宣使先往奏稟皇后奉旨請師渡河其水東北流瀾漫沒軸絕流以濟入營軍南岸車帳千百日以醞醢漚酪爲供漢夏公主皆送寒具等食黍米斗白金十兩滿五十兩可易麵八十斤蓋麵出陰山之後二千餘里西域賈胡以橐駝負至也中伏帳房無蠅窩里朶漢語行宮也其車輿亭帳望之儼然

古之大單于未有若此之盛也七月九日同宣使西南行五六日屢見山上有雪山下往往有墳墓及升高陵又有祀神之跡又三二日歷一山高峰如削松杉鬱茂西有海子南出大峽則一水西流雜木叢映於水之陽葦茂如芳草夾道連數十里北有故城曰曷刺肖西南過沙場二十里許水草極少始見回紇決渠灌麥又五六月踰嶺而南至蒙古營宿拂旦行迤邐南山望之有雪因以詩記其行當時悉達悟空晴發軔初來燕子城

撫州是也北至大河三月數即陸局河也四月西臨積雪半年程此

地也山常有雪東至陸局河約五千里七月盡到不能隱地迴風坐道法有迴風隱地攀斗藏天之術

卻使彌天逐日行行到水窮山盡處斜陽依舊向西傾郵人告

道藏輯要 西遊記 十 胃集三

曰此雪山北是田鎮海八刺喝孫也八刺喝孫漢語為城中有倉廩故又呼曰倉頭七月二十五日有漢民工匠絡繹來迎悉皆歡呼歸禮以彩幡華蓋香花前導又有章缺二妃曰徒單氏曰夾谷氏及漢公主母欽聖夫人袁氏號泣相迎顧謂師曰昔日稔聞道德高風憾不一見不意此地有緣也翌日阿不罕山北鎮海來謁師與之語曰吾壽已高以皇帝二詔丁靈不免遠行數千里方臨治下沙漠中多不以耕耘為務喜見此間秋稼已成余欲於此過冬以待鑿輿之迴何如宣使曰父師既有法旨仲祿不敢可否惟鎮海相公度之公曰近有勅諸處官員如遇真人經過無得稽其程蓋欲速見之也父師若需於此則罪

在鎮海矣願親從行凡師之所用敢不備師曰因緣如此當卜
日行公曰前有大山高峻廣澤沮陷非車行所宜減車從輕騎
以進用其言留門弟子宋道安輩九人選地爲觀人不召而至
壯者効其力匠者効其技富者施其財聖堂方丈東厨西廡左
右雲房無瓦皆土木不一月落成榜曰棲霞觀時稷黍在地八月初
霜降居人促收麥霜故也大風傍北山西來黃沙蔽天不相物
色師以詩自嘆云邱也東西南北人從來失道走風塵不堪白
髮垂垂老又踏黃沙遠遠巡未死且令觀世界殘生無分樂天
眞四山五嶽都遊徧八表飛騰後入神八日攜門人虛靜先生
趙九古輩十人從以二車蒙古驛騎二十餘傍大山西行宣使

道藏輯要

西遊記

十一

胃集三
大谷文々

劉公鎮海相公又百騎李家奴鎮海從者也因曰前此山下精
截我腦後髮我甚恐鎮海亦云乃滿國王亦曾在此爲山精所
惑食以佳饌師默而不答西南約行三日復東南過大山經大
峽中秋日抵金山東北少駐復南行其山高深谷長坂車不
可行三太子出軍始闢其路乃命百騎挽繩縣轅以上縛輪以
下約行四程連度三嶺南出山前臨河止泊從官連幕爲營因
水草便以待鋪牛驛騎數日乃行有詩三絕云八月涼風爽氣
清那堪日暮碧天晴欲吟勝概無才思空對金山皓月明其二
云金山南面大河流河曲盤桓賞素秋秋水暮天山月上清吟
獨嘯夜光毬其三云金山雖大不孤高四面長拖拽腳牢橫截

大山心腹樹干雲蔽日競呼號渡河而南前經小山石雜五色其旁草木不生首尾七十里復有二紅山當路又三十里鹹鹵地中有一小沙井因駐程挹水爲食傍有青草多爲羊馬踐履宣使與鎮海議曰此地最難行處相公如何則可公曰此地我知之久矣同往諮師公曰前至白骨甸地皆黑石約行二百餘里達沙陁北邊頗有水草更涉大沙陁百餘里東西廣袤不知其幾千里及回紇城方得水草師曰何謂白骨甸公曰古之戰場凡疲兵至此十無一還死地也頃者乃滿大勢亦敗於是遇天晴晝行人馬往往困斃唯暮起夜度可過其半明日向午得及水草矣少憩候哺時卽行當度沙嶺百餘若舟行巨浪然又

道藏輯要

西遊記

七

胃集三
大日文川

明日辰巳間得達彼城矣夜行良便但恐天氣黯黑魑魅魍魎爲祟我輩常塗血馬首以厭之師乃笑曰邪精妖鬼逢正人遠避書傳所載其孰不知道人家何憂此事日暮遂行牛乏皆道弃之馭以六馬自爾不復用牛矣初在沙陁北南望天際若銀霞問之左右皆未詳師曰多是陰山翌日過沙陁遇郊者再開之皆曰然於是途中作詩云高如雲氣白如沙遠望那知是眼花漸見山頭堆玉屑遠觀日腳射銀霞橫空一字長千里照地連城及萬家從古至今常不壞吟詩寫向直南誇八月二十七
日抵陰山後回紇郊迎至小城北會長設蒲萄酒及名果大餅渾葱裂波斯布人一尺乃言曰此陰山前三百里至和州也其地

大熱蒲萄至夥翌日沿川西行歷一小城皆有居人時禾麥初熟皆賴泉水澆灌得有秋少雨故也西即鼈思馬大城王官士庶僧道數百具威儀遠迎僧皆赭衣道士衣冠與中國特異泊於城西蒲萄園之上閣時同紇王部族勸蒲萄酒供以異花雜果名香且列侏儒伎樂皆中州人士庶日益敬侍坐者有僧道儒因問風俗乃曰此大唐時北庭端府景龍二年楊公何爲大都護有德政諸夷心服惠及後人於今賴之有龍興西寺二石刻在功德煥然可觀寺有佛書一藏唐之邊城往往尚存其東數百里有府曰西涼其西三百餘里有縣曰輪臺師問曰更幾程得至行在皆曰西南更行萬餘里卽是其夜風雨作園外有

道藏輯要

西遊記

三

胃集三
卷之十

大樹復出一篇示取二夜宿陰山下陰山夜寂寥長空雲黯黯大樹葉蕭蕭萬里途程遠三冬氣候韶全身都放下一任斷蓬飄九月二日西行四日宿輪臺之東迭屑頭目來迎南望陰山三峰突兀倚天因述詩贈書生李伯祥生相人詩云三峰並起插雲寒四壁橫陳遶澗盤雪嶺界天人不到冰池耀日俗難觀

人云向此冰池之間觀看則魂識昏昧

巖深可避刀兵害

其巖險固逢亂世堅守則得免其難

水眾

能滋稼穡乾

下有泉源可以灌溉田禾每歲秋成

名鎮北方爲第一無人寫向盡

圖看又歷二城重九日至回紇昌八刺城其王畏午兒與鎮海有舊率諸部族及回紇僧皆遠迎旣入齋於臺上洎其夫人勸蒲萄酒且獻西瓜其重及秤甘瓜如枕許其香味蓋中國未有

也園蔬同中區有僧來侍坐使譯者問看何經典僧云剃度受戒禮佛爲師蓋此以東昔屬唐故西去無僧道回紇但禮西方耳翌日並陰山而西約十程又度沙場其沙細遇風則流狀如驚濤乍聚乍散寸草不萌車陷馬滯一晝夜方出蓋白骨甸大沙分流也南際陰山之麓踰沙又五日宿陰山北詰朝南行長坂七八十里抵暮乃宿天甚寒且無水晨起西南行約二十里忽有大池方圓幾二百里雪峰環之倒影池中師名之曰天池沿池正南下左右峰巒峭拔松樺陰森高踰百尺自巔及麓何啻萬株眾流入峽奔騰洶湧曲折灣環可六七十里二太子扈從西征始鑿石理道刊木爲四十八橋橋可並車薄暮宿峽中

道藏輯要

西遊記

西

胃集三
XIV 文三

翌日方出入東西大川水草豐秀天氣似春稍有桑棗次及一程九月二十七日至阿里馬城鋪速滿國王暨蒙古答刺忽只領諸部人來迎宿於西果園土人呼果爲阿里馬蓋多果實以是名其城其地出帛曰曰禿鹿麻蓋俗所謂種羊毛織成者時得七束爲禦寒衣其毛類中國柳花鮮潔細軟可爲線爲繩爲帛爲綿農者亦決渠灌田土人唯以瓶取水戴而歸及見中原汲器喜曰桃花石諸事皆巧桃花石謂漢人也師自金山至此以詩記其行云金山東畔陰山西千巖萬壑攢深溪溪邊亂石當道卧古今不許通輪蹄前年軍興二太子修道架橋徹溪水

三太子修金山
二太子修陰山

今年吾道欲西行車馬喧闐復經此銀山鐵壁

千萬重爭頭競角誇清雄日出下觀滄海近月明上與天河通
參天松如筆管直森森動有百餘尺萬株相倚鬱蒼蒼一鳥不
鳴空寂寂羊腸孟門壓太行比斯大略猶尋常雙車上下苦敦
擷百騎前後多驚惶天池海在山頭上百里鏡空含萬象縣車
東馬西下山四十八橋低萬丈河南海北山無窮千變萬化規
模同未若茲山太奇絕磊落峭拔加神功我來時當八九月半
山已上皆爲雪山前草木暖如春山後衣袂冷如鐵連日所供
勝前又西行四日至答刺速沒輦沒輦沒輦河也水勢深闊抵西北流從
東來截斷陰山河南復是雪山十月二日乘舟以濟南下至一
大山北有一小城又西行五日宣使以師奉詔來去行在漸通

道藏輯要

西遊記

五

胃集三
メの女上三

先往馳奏獨鎮海公從師西行七日度西南一山逢東夏使迴
禮師於帳前因問來自何時使者曰自七月十二日辭朝帝將
兵追算端汗至印度明日遇大雪至回紇小城雪盈尺日出即
消十有六日西南遇板橋渡河晚至南山下即大石林牙大石
林牙
小名其國王遼後也白金師破遼大石林牙領眾數千走西北
移徙十餘年方至此地其風土氣候與金山以北不同平地頗
多以農桑爲務釀蒲萄爲酒果實與中國同惟經夏秋無雨皆
疏河灌溉百穀用成東北西南左山右川延袤萬里傳國幾百
年乃滿失國依大石土馬復振盜據其土繼而算端西削其地
天兵至乃滿尋滅算端亦亡又聞前路多阻適壞一車遂留之

十有八日沿山而西七八日山忽南去一石城當途石色盡赤
有駐軍古跡西有大塚若斗星相聯又渡石橋並西南山行五
程至塞藍城有小塔同紇王來迎入館十一月初連日雨大作
四日土人以爲年旁午相賀是日虛靜先生趙九古語尹公曰
我隨師在宣德時覺有長往之兆頗倦行役嘗蒙師訓道人
以死生動心不以苦樂介懷所適無不可今歸期將至公等善
事父師數日示疾而逝蓋十一月五日也師命門弟子墓九古
於郭東原上卽行西南復三日至一城其王亦回紇年已耄矣
備迎送禮供以湯餅明日又歷一城復行二日有河是爲霍闡
沒輦由浮橋渡泊於西岸河橋官獻魚於田相公巨口無鱗其
道藏輯要

西遊記

去

胃集三
ノリ文リ

河源出東南二大雪山間色渾而流急深數丈勢傾西北不知
其幾千里河之西南絕無水草者二百餘里卽夜行復南望大
雪山而西山形與邪米干之南山相首尾復有詩云造物崢嶸
不可名東西羅列自天成南橫玉嶠連峰峻北壓金沙帶野平
下枕泉源無極潤上通霄漢有餘清我行萬里慵開口到此狂
吟不勝情又至一城得接水草復經一城同紇頭目遠迎飯於
城南獻蒲萄酒且使小兒爲緣竿舞刀之戲再經二城山行半
日入南北平川宿大桑樹下其樹可蔭百人前至一城臨道一
井深踰百尺有回紇雙驅一牛挽轆轤汲水以飲渴者初帝之
西征也見而異之命竊其賦役仲冬十有八日過大河至邪米

思千大城之北太師移刺國公及蒙古回紇帥首載酒郊迎大設帷幄因駐車焉宣使劉公以路梗留坐中白師曰頃知千里外有大河以舟梁渡土寇壞之況復已及深冬父師似宜來春朝見師從之少焉由東北門入其城因溝岸爲之秋夏常無雨國人疏二河入城分遶巷陌比屋得用方箕端氏之未敗也城中常十萬餘戶國破而來存者四之一其中大率多回紇人田園自不能主須附漢人及契丹河西等其官長亦以諸色人爲之漢人工匠雜處城中有岡高十餘丈算端氏之新宮據焉太師先居之以回紇艱食盜賊多有恐其變出居於水北師乃住宮嘆曰道人任運逍遙以度歲月白刃臨頭猶不畏懼況盜賊

道藏輯要

西遊記

七

胃集三
XO X / X

未至復預憂乎且善惡兩途必不相害從者安之太師作齋獻金段十師辭不受遂月奉米麵鹽油果菜等物日益尊敬公見師飲少請以蒲萄百斤新作釀師曰何必酒邪但如其數得之待賓客足矣其蒲萄經冬不壞又見孔雀大象皆東南數千里印度國物師因暇日出詩一篇云二月經行十月終西臨回紇大城墉塔高不見十三級以輒刻鏤玲瓏外無層級內可通行山厚已過千萬重秋日在郊猶放象夏雲無雨不從龍嘉蔬麥飯蒲萄酒飽食安眠養素慵師旣住冬宣使洎相公鎮海道曷刺等同一行使臣領甲兵數百前路偵伺漢人往來歸依時有算厯者在旁師因問五月朔日食事其人云此中辰時食至六分止師曰前在

陸局河時午刻見其食既又西南至金山人言已時食至七分
此三處所見各不同按孔穎達春秋疏日月映日則日食以今
料之蓋當其下卽見其食既在旁者則千里漸殊耳正如以扇
翳燈扇影所及無復光明其旁漸遠則燈光漸多矣師一日故
宮中遂書鳳棲梧詞二首於壁其一云一點靈明潛啟悟天上
人間不見行藏處四海八荒唯獨步不空不有誰能覩瞬目揚
眉全體露混混茫茫法界超然去萬劫輪迴遭一遇九玄齊上
三清路其二云日月循環無定止春去秋來多少榮枯事五帝
三皇千百禩一興一廢長如此死去生來生復死生死輪迴變
化何時已不到無心休歇地不能清淨超於彼又詩二首其一

道藏輯要

西遊記

六

胃集三
XO文リ

云東海西秦數十年精思道德究重玄日中一食那求飽夜半
三更強不眠實跡未諧霄漢舉虛名空播朔方傳直教大國垂
明詔萬里風沙走極邊其二云弱冠尋真傍海濤中年遁跡隴
山高河南一別昇黃鵠塞北重宣鈞巨鼇無極山川行不盡有
爲心跡動成勞也知六合三千界不得神通未可逃是年閏十
二月將終偵騎迴同宣使來白父師言二太子發軍復整舟梁
土寇已滅曷刺等詣營謁太子言師欲朝帝所復承命云上駐
蹕大雪山之東南今則雪積山門百餘里深不可行此正其路
爾爲我請師來此聽候良便來時當就彼城中遣蒙古軍護送
師謂宣差曰聞河以南千里絕無種養吾食須米麵蔬菜可迴

報太子帳下壬午之春正月杷欖始華類小桃俟秋採其實食之味如胡桃二月二日春分杏花已落司天臺判李公輩請師遊郭西宣使泊諸官載蒲萄酒以從是日天氣晴霽花木鮮明隨處有臺池樓閣間以蔬圃憇則藉草人皆樂之談玄論道時復引觴日昃方歸作詩云陰山西下五千里大石東過二十程雨霽雪山遙慘淡春分河府近清明邪米思干大城大石有國時名爲河中府園林寂寂鳥無語花木雖茂並無飛禽風日遲遲花有情同志暫來閑睥睨高吟歸去待昇平望日乃一百五日太上眞元節也時僚屬請師復遊郭西園林相接百餘里雖中原莫能過但寂無鳥聲耳遂成一篇以示同遊其一云二月中分百五期玄元下降日遲遲

道藏輯要

西遊記

克

胃集三

正當月白風清夜更好雲收雨霽時市地園林行不盡照天花木坐觀奇未能絕粒成嘉遁且向無爲樂有爲其二云深蕃古跡尙橫陳大漢良朋欲徧巡舊日亭臺隨處列向年花卉逐時新風光甚鮮留連客夕照那堪斷送人竊念世間酬短景何如天外飲長春三月上旬阿里鮮至自行宮傳旨云眞人來自日出之地跋涉山川勤勞至矣今朕已迴亟欲聞道無倦迎我次諭宣使仲祿曰爾持詔徵聘能副朕心佗日當置汝善地復諭鎮海曰汝護送眞人來甚勤余惟汝嘉仍敕萬戶播魯只以甲士千人衛過鐵門師問阿里鮮以途程事對曰春正月十有三日自此初發馳三日東南過鐵門又五日過大河二月初吉東

南過大雪山積雪甚高馬上舉鞭測之猶未及其半下所踏者復五尺許南行三日至行宮矣且師至次第奏訖上說留數日方迴師遂留門人尹公志平輩三人於館以侍行五六人同宣使輩三月十有五日啟行四日過碣石城預傳

聖旨令萬戶播魯只領蒙古回紇軍一千護送過鐵門東南度山山勢高大亂石縱橫戢軍挽車兩日方至山前沿流南行軍卽北入大山破賊五日至小河亦船渡兩岸林木茂盛七日舟濟大河卽阿母沒輦也乃東南行晚泊古渠上渠邊蘆葦滿地不類中原所有其大者經冬葉青而不凋因取以爲杖夜橫轅下轅覆不折其小者葉枯春煥少南山中有大實心竹士卒以

道藏輯要

西遊記

三

胃集三
卷之三

爲戈戟又見蜴蜥皆長三尺許色青黑時三月二十九日也因作詩云志道旣無成大魔深有懼東辭海上東西望日邊去雞犬不聞聲馬牛更遞舖千山及萬水不知是何處又四日得達行在上遣大臣喝刺播得來迎時四月五日也館舍定卽入見上勞之曰佗國徵聘皆不應今遠踰萬里而來朕甚嘉焉對曰山野奉詔而赴者天也上悅賜坐食次問真人遠來有何長生之藥以資朕乎師曰有衛生之道而無長生之藥上嘉其誠實設二帳於御幄之東以居焉譯者問曰人呼師爲騰吃利蒙古孔譯語謂天人也自謂之邪人稱之邪師曰山野非自稱人呼之耳譯者再至曰舊奚呼奏以山野四人事重陽師學道三子羽化矣

唯山野處世人呼以先生上問鎮海曰真人當何號鎮海奏曰
有人尊之曰師父者真人者曰神仙者上曰自今以往可呼神
仙時適炎熱從車駕廬於雪山避暑上約四月十四日問道外
使田鎮海劉仲祿阿里鮮記之內使近侍三人記之將及期有
報回紇山賊指斥者上欲親征因改卜十月吉師乞還舊館上
曰再來不亦勞乎師曰兩句可矣上又曰無護送者師曰有宣
差楊阿狗又三日命阿狗督同紇酋長以千餘騎從行由佗路
迴遂歷大山山有石門望如削蠟有巨石橫其上若橋焉其下
流甚急騎士策其驢以涉驢遂溺死水邊尙多橫屍此地蓋關
口新爲兵所破出峽復有詩二篇其一云水北鐵門猶白可水

道藏輯要

西遊記

三

胃集二
800川

南石峽太堪驚兩岸絕壁攬天聳一澗寒波滾地傾夾道橫屍
人掩鼻溺溪長耳我傷情十年萬里干戈動早晚迴軍復太平
其二云雪嶺皚皚上倚天晨光燦燦下臨川仰觀峭壁人橫度
俯視危崖柏倒懸五月嚴風吹面冷三臘熱病當時瘥我來演
道空回首更卜良辰待下元始師來觀三月竟草木繁盛羊馬
皆肥及奉詔而回四月終矣百草悉枯又作詩云外國深蕃事
莫窮陰陽氣候特無從纔經四月陰魔盡春冬霖雨四月
純陽絕無雨卻早
彌天旱魃凶浸潤百川當九夏以水
溉田摧殘萬草若三冬我行往
復三千里三月去
五月回不見行人帶雨容路逢征西人回多獲珊瑚
有從官以白金二鎰易之近五十株高者尺餘以其得之馬上

不能完也繼日乘涼宵征五六日達邪米思干大石名諸官迎
師入館卽重午日也

宣差李公東邁以詩寄東方道眾云當時發軔海邊城海上干

戈尙未平道德欲興千里外風塵不憚九夷行初從西北登高

嶺卽野漸轉東南指上京陸局河東畔東南望上京也迤邐直西南下去西南

四千里到兀里朶又陰山之外不知名陰山西南一重大山一重小水數千里到邪米

思干大城師館於故宮師旣還館館據北崖俯清溪十餘丈溪水自雪山

來甚寒仲夏炎熱就北軒風臥夜則寢屋顛之臺六月極暑浴

池中師之在絕域自適如此河中壤地宜百穀唯無蕎麥大豆

四月中麥熟土俗收之亂堆於地遇用卽碾六月始畢太師府

道藏輯要 西遊記 三 胃集三

提控李公獻瓜田五畝味極甘香中國所無間有大如斗者六

月間二太子迴劉仲祿乞瓜獻之十枚可重一擔果菜甚贍所

欠者芋栗耳茄實若麤指而色紫黑男女皆編髮男冠則或如

遠山帽飾以雜綵刺以雲物絡之以纓自酋長以下在位者冠

之庶人則以白麼斯布六尺許盤於其首酋豪之婦纏頭以羅

或早或紫或繡花卉織物象長可五六尺髮皆垂有袋之以絲

者或素或雜色或以布帛爲之者不梳髻以布帛蒙之若比邱

尼狀庶人婦女之首飾也衣則或用白氎縫如注袋窄上寬下

綴以袖謂之襯衣男女通用車舟農器制度頗異中原國人皆

以鍮石銅爲器皿間以磁有若中原定磁者酒器則純用琉璃

兵器則以鑽市用金錢無輪孔兩面鑿回紇字其人物多魁梧有膂力能負戴重物不以擔婦人出嫁夫貧則再嫁遠行踰三月則亦聽他適異者或有鬻鬻國中有一稱大石馬者識其國字專掌簿籍遇季冬設齋一月比暮其長自割羊爲食與席者同享自夜及旦餘月則設六齋又於危會上挑出大木如飛簷長闊丈餘上構虛亭四垂纓絡每朝夕其長登之禮西方謂之告天不奉佛不奉道大呼吟於其上丁男女聞之皆趨拜其下舉國皆然不爾則弃市衣與國人同其首則髻以細縷斯長三丈二尺骨以竹師異其俗作詩以記其實云回紇邱墟萬里疆河中城大最爲強滿城銅器如金器一市戎裝似道裝剪鍍黃金

道藏輯要

西遊記

三

胃集三
大文川

爲貨賂裁縫白氎作衣裳靈瓜素椹非凡物赤縣何人搆得嘗當暑雪山甚寒烟雲慘淡師乃作絕句云東山日夜氣濛濛曉色彌天萬丈紅明月夜來飛出海金光射透碧霄空師在館賓客甚少以經書遊戲復有絕句云北出陰山萬里餘西過大石半年居遐荒鄙俗難論道靜室幽巖且看書七月載生魄遣阿里鮮奉表詣行宮稟論道日期八月七日得上所批答八日卽行太師相送數十里師乃曰回紇城東新叛者二千戶夜夜火光照城人心不安太師可迴安撫太師曰在路萬一有不虞奈何師曰豆關太師事乃迴十有二日過碣石城十有三日得護送步卒千人甲騎三百入大山中行卽鐵門外別路也涉紅水

澗有峻峰高數里谷東南行山根有鹽泉流出見日卽爲白鹽因收二斗隨行日用又東南上分水嶺西望高澗若冰乃鹽耳山上有紅鹽如石親嘗見之東方唯下地生鹽此方山間亦出鹽回紇多餅食且嗜鹽渴則飲水冬寒貧者尙負餅售之十有四日至鐵門西南之麓將出山其山門嶮峻左崖崩下澗水伏流一里許中秋抵河上其勢黃河流西北乘舟以濟宿其南岸西有山寨名團八刺山勢險固三太子之醫官鄭公途中相見以詩贈云自古中秋月最明涼風扇候夜彌清一天氣象沈銀漢四海魚龍耀水精吳越樓臺歌吹滿燕秦部曲酒肴盈我之帝所臨河上欲罷干戈致太平沂河東南行三十里乃無水卽

道藏輯要

西遊記

三

胃集三
×××文川

夜行過班里城甚大其眾新叛去尙聞犬吠黎明飯畢東行數十里有水北流馬僅能渡東岸憩宿二十二日田鎮海來迎及行宮上復遣鎮海問曰便欲見邪且少憩邪師曰入見是望且道人從來見帝無跪拜禮入帳折身叉手而已旣見賜酒酪竟乃辭上因問所居城內支供足乎師對從來蒙古回紇太師支給適者食用稍難太師獨辦翌日又遣近侍官合住傳旨曰真人每日來就食可乎師曰山野修道之人唯好靜處上令從便二十七日車駕北迴在路屢賜葡萄酒瓜果食九月朔渡航橋而北師奏話期將至可召太師阿海其月望上設幄齋莊退侍女左右燈燭燁煌唯闍利必鎮海宣差仲祿侍於外師與太師

阿海阿里鮮入帳坐奏曰仲祿萬里周旋鎮海數千里遠送亦可入帳預聞道話於是召二人入師有所說即令太師阿海以蒙古語譯奏頗愜聖懷十有九日清夜再召師論道上大悅二十有二日又宣師入幄禮如初上溫顏以聽令左右錄之仍勅誌以漢字意示不忘謂左右曰神仙三說養生之道我甚入心使勿泄於外自爾扈從而東時敷奏道化又數日至邪米思干大城西南三十里十月朔奏告先還舊居從之上駐蹕於城之東二十里是月六日暨太師阿海入見上曰左右不去如何師曰不妨遂令太師阿海奏曰山野學道有年矣常樂靜處行坐御帳前軍馬雜遝精神不爽自此或在先或在後任意而行山

道藏輯要

西遊記

三五

胃集三

野受賜多矣上從之既出帝使人追問曰要禿鹿馬否師曰無用於時微雨始作青草復生仲冬過半則雨雪漸多地脈方透自師之至斯城也有餘糧則惠饑民又時時設粥活者甚眾二十有六日即行十二月二十三日雪寒在路牛馬多凍死者又三日東過霍闡沒輦大河也至行在聞其航橋中夜斷散蓋二十八日也帝問以震雷事對曰山野聞國人夏不浴於河不浣衣不造氊野有菌則禁其採者畏天威也此非奉天之道也常聞三千之罪莫大於不孝者天故以是警之今聞國俗多不孝父母帝乘威德可戒其眾上悅曰神仙是言正合朕心勅左右紀以同紇字師請徧諭國人上從之又集太子諸王大臣曰漢人

尊重神仙猶汝等敬天我今愈信真天人也乃以師前後奏對語諭之且云天俾神仙爲朕言此汝輩各銘諸心師辭退逮正旦將帥醫卜等官賀師十有一日馬首遂東西望邪米思干千餘里駐大果園中十有九日父師誕日眾官炷香爲壽二十八日太師府提控李公別去師謂曰再相見也無李公曰二月相見師曰汝不知天理二三月決東歸矣二十一日東遷一程至一大川東北去賽藍約三程水草豐茂可飽牛馬因盤桓焉二月上七日師入見奏曰山野離海上約三年迴今茲三年復得歸山固所願也上曰朕已東矣同途可乎對曰得先行便來時漢人問山野以還期賞答云三歲今上所諮訪敷奏訖因復固

道藏輯要

西遊記

三

胃集三

辭上曰少俟三五日太子來前來道話所有未解者朕悟卽行八日上獵東山下射一大豕馬踏失馭豕傍立不敢前左右進馬遂罷獵還行宮師聞之入諫曰天道好生今聖壽已高宜少出獵墜馬天戒也豕不敢前天護之也上曰朕已深省神仙勸我良是我蒙古人騎射少所習未能遽已雖然神仙之言在衷焉上顧謂吉息利答刺汗曰但神仙勸我語以後都依也自後兩月不出獵二十有四日再辭朝上曰神仙將去當與何物朕將思之更少待幾日師知不可遽辭徧翔以待三月七日又辭上賜牛馬等物師皆不受曰祇得驛騎足矣上問通事阿里鮮曰漢地神仙弟子多少對曰甚眾神仙來時德興府龍陽觀中

常見官司催督差發上謂曰應于門下人悉令蠲免仍賜聖旨
文字一通且用御寶因命阿里鮮河西爲宣差以蒙古帶喝刺

八海副之護師東還十日辭朝行自答刺汗已下皆攜蒲萄酒

珍果相送數十里臨別眾皆揮涕三日至賽藍大城之東南山

有蛇兩頭長二尺許土人往往見之望日門人出郊致奠於虛

靜先生趙公之墓眾議欲負其骨歸師曰四大假軀終爲弃物

一靈眞性自在無拘眾議乃息師明日遂行二十有三日宣差

阿狗追餞師於吹沒輦之南岸又十日至阿里馬城西百餘里

濟大河四月五日至阿里馬城之東園二太子之太匠張公固

請曰弟子所居營三壇四百餘人晨參暮禮未嘗懈怠且預接

道藏輯要

西遊記

三

胃集三
又曰又又

數日伏願仙慈渡河俾壇眾得以請教幸甚師辭曰南方因緣

已近不能遷路以行復堅請師曰若無佗事卽當往焉翌日師

所乘馬突東北去從者不能挽於是張公等悲泣而言曰我輩

無緣天不許其行矣晚抵陰山前宿又明日復度四十八橋緣

溪上五十里至天池海東北過陰山後行二日方接元歷金山

南大河驛路復經金山東南北並山行四月二十八日大雨雪

翌日滿山皆白又東北並山行三日至阿不罕山前門人朱道

安輩九人同長春玉華會眾宣差郭德全輩遠迎入棲霞觀歸

依者日眾師下車時雨再降人相賀曰從來此地經夏少雨縱

有雪雨多於南北兩山之間今日霑足皆我師道廕所致也居

人常歲疏河灌田圃至八月禾麥始熟終不及天雨秋成則地鼠爲害鼠多白者此地寒多物晚結實五月河岸土深尺餘其下堅冰亦尺許齋後日使人取之南望高嶺積雪盛暑不消多有異事少西海子傍有風塚其上土白望多粉裂其上二三月中卽風起南山崑穴先鳴蓋先驅也風自塚間出初旋動如羊角者百千數少焉合爲一風飛沙走石發屋拔木勢震百川息於巽隅又東南澗後有水磨三四至平地則水漸微而絕山出石炭又東有二泉三冬暴漲如江湖復潛行地中俄而突出魚蝦隨之或漂沒居民仲春漸消地乃陷西北千餘里儉儉州出良鐵多青鼠亦收麻麥漢匠千百人居之織綾羅錦綺道院西

道藏輯要

西遊記

天

胃集三
又女川

南望金山其山多雨雹五六月間或有大雪深丈餘此地間有沙陀出肉苾薶國人呼曰唆眼水曰兀速草曰愛不速深入山陰松皆十丈許會眾白師曰此地深蕃太古以來不聞正教唯山精鬼魅惑人自師立觀疊設醮筵巨望作會人多以殺生爲戒若非道化何以得然先是壬午年道眾爲不善人妬害眾不安宋公道安晝寢方丈忽於天窻中見虛靜先生趙公曰有書至道安問從何來曰天上來受而視之止見太清二字忽隱去翌日師有書至魔事漸消又鑿者羅生橫生非毀一日墮馬觀前折其脛卽自悔曰我之過也對道眾服罪師東行書教語一篇示眾云萬里乘官馬三年別故人干戈猶未息道德偶然陳

論氣當秋夜

對上論養生事故云

還鄉及暮春思歸無限眾不得下情伸

阿里鮮等白師曰南路饒沙石鮮水草使客甚繁馬甚苦恐留滯師曰分三班以進吾徒無患矣五月七日令宋道安夏志誠宋德方孟志温何志堅潘德冲六人先行十有四日師挈尹志平王志明于志可鞠志圓楊志靜蔡志清六人次之餞行者夾谷妃郭宣差李萬戶等數十人送二十里皆下馬再拜泣別師策馬亟進十有八日張志素孫志堅鄭志修張志遠李志常五人又次之師東行十六日過大山山上有雪甚寒易騎於拂廬十七日師不食但時時飲湯東南過大沙場有草木其間多蚊虻夜宿河東又數日師或乘車尹志平輩諮師曰奚疾師曰余

道藏輯要

西遊記

五

胃集三
天〇又上

疾非醫可測聖賢琢磨故也卒未能愈汝輩勿慮眾愀然不釋是夕尹志平夢人曰師之疾公輩勿憂至漢地當自愈行又經沙路三百餘里水草絕少馬夜進不息再宿乃出地臨夏人之北僦廬帳漸廣馬易得後行者乃及師六月二十一日宿漁陽關師尚未食明日度關而東五十里至豐州元帥以下來迎宣差俞公請泊其家奉以湯餅是日輒飽食繼而設齋飲食乃如故道眾相謂曰清和前日之夢驗不虛矣時已季夏北軒涼風入坐俞公以蠶紙求書師書之云身閒無俗念鳥宿至雞鳴一眼不能睡寸心何所縈雲收溪月白烝爽谷神清不是朝昏坐行功扭捏成七月朔復起三日至下水元帥夾谷公出郭來迎

館於所居來瞻禮者無慮千人元帥日益敬有雞鴈三七夕日
師遊郭外放之海子中少焉翔戲於風濤之間容與自得師賦
詩曰養爾存心欲薦庖逢吾念善不爲肴扁舟送在鯨波裏會
待三秋長六梢又云兩兩三三好弟兄秋來羽翼未能成放歸
碧海深沈處浩蕩波瀾快野情翌日乃行是月九日至雲中宣
差總管阿不台與道眾出京以步輦迎歸於第樓居二十餘日
總管以下晨參暮禮雲中士大夫日來請教以詩贈之二云得
旨還鄉早乘春造物多三陽初變化一氣自沖和驛馬程程送
雲山處處羅京城一萬里重到卽如何十有三日宣差阿里鮮
欲往山東招諭懇求與門弟子尹志平行師曰天意未許雖往

道藏輯要

西遊記

三

胃集三
ノノノ

何益阿里鮮再拜曰若國王臨以大軍生靈必遭殺戮願父師
一言垂慈師良久曰雖救之不得猶愈於坐視其死也乃令清
和同往卽付招諭書一副又聞宣德以南諸方道眾來參者多
恐隨庵困於接待令尹公約束付親筆云長行萬里一去三年
多少道人縱橫無賴者尹公到日一面施行勿使教門有妨道
化眾生福薄容易轉流上山卽難下坡省力耳宣德元帥移刺
公遣專使持書至雲中以取乘馬奉師八月初東邁楊河歷白
登天城懷安渡潰河凡十有二日至宣德元帥具威儀出郭西
遠迎師入居州之朝元觀道友敬奉遂書四十字云萬里遊生
界三年別故鄉迴頭身已老過眼夢何長浩浩天空闊紛紛事

杳茫江南及塞北從古至今常道眾且云去冬有見虛靜先生
趙公牽馬自門入者眾爲之出迎忽不見又德興安定亦有人
見之河朔州府王官將帥及一切士庶爭以書疏來請若輻輳
然止迴答數字而已有云王室未寧道門先暢開度有緣恢弘
無量羣方帥首志心歸向憾不化身分酬眾望十月朔作醮於
龍門川望日醮於本州朝元觀十一月望宋德方等以向日過
野狐嶺見白骨所發願心乃同太君尹千億醮於德興之龍陽
觀濟度孤魂前數日稍寒及設醮一夜三日有如春醮畢元帥
賈昌至自行在傳言神仙自春及夏道途匪易所得食物驛騎
好否到宣德等處有司在意館穀否招諭在下人戶得來否朕

道藏輯要

西遊記

三

胃集三
合文川

常念神仙神仙無忘朕十二月既望醮於蔚州三館師於龍陽
住冬旦夕常往龍岡閑步下視德興以兵革之後村落蕭條作
詩以寫其意云昔年林木參天合今日村坊徧地開無限蒼生
臨白刃幾多華屋變青灰又云豪傑痛吟千萬首古今能有幾
多人研窮物外閑中趣得脫輪迴泉下塵甲申之春二月朔醮
於縉山之秋陽觀觀在大翻山之陽山水明秀松蘿煙月道家
之地也以詩題其槩云秋陽觀後碧富深萬頃煙霞插翠岑一
徑桃花春水急彎環流出洞天心又云羣山一帶碧嶢峨上有
羣仙日夜過洞府深沈人不到時聞巖壁洞仙歌燕京行省金
紫石抹公宣差便宜劉公以下諸官遣使者持疏懇請師住大

天長觀許之既而以驛召乃度居庸而南燕京道友來迎於南
口神游觀明日四遠父老士女以香花導師入京瞻禮者塞路
初師之西行也眾請還期師曰三載歸三載歸至是果如其言
以上七日入天長觀齋者日千人望日會眾請赴玉虛觀是月
二十五日喝刺至自行宮傳旨神仙至漢地以清淨道化人每
日與朕誦經祝壽甚好教神仙好田地內愛住處住道與阿里
鮮神仙壽高善爲護持神仙無忘朕舊言仲夏行省金紫石抹
公便宜劉公再三持疏請師住持大天長觀是月二十有二日
赴其請空中有數鶴前導係西北而去自師寓玉虛或就人家
齋常有三五鶴飛鳴其上北方從來奉道者鮮至是聖賢欲使

道藏輯要

西遊記

三

胃集三
大台文川

人歸向以此顯化耳八會之眾皆稽首拜跪作道家禮時俗一
變玉虛井水舊鹹苦甲申乙酉年西來道眾甚多水味變甘亦
善緣所致也季夏望日宣差相公劄八傳旨自神仙去朕未嘗
一日忘神仙神仙無忘朕朕所有之地愛願處卽住門人恒爲
朕誦經祝壽則嘉自師之復來諸方道侶雲集邪說日寢京人
翕然歸慕若戶曉家諭教門四關百倍往昔乃建八會於天長
曰平等曰長春曰靈寶曰長生日明真曰平安曰消灾曰萬蓮
師旣歸天長遠方道人繼來求法名者日益眾嘗以四頌示之
其一云世情無斷滅法界有消磨好惡縈心曲漂淪奈爾何其
二三云有物先天貴無名不自生人心常隱伏法界任縱橫其三

云狗物雙眸眩勞生四大窮世間渾是假心上不知空其四云
昨日念無蹤今朝事亦同不如齊放下度日且空空每齋畢出
遊故苑瓊華之上從者六七人宴坐松陰或自賦詩相次屬和
間因茶罷令從者歌游仙曲數闕夕陽在山澹然忘歸由是行
省及宣差劄八相公北宮園池并其近地數十頃爲獻且請爲
道院師辭不受請至於再始受之既而又爲頌文牒以禁樵採
者遂安置道侶日益修葺後具表以聞上可其奏自爾佳時勝
日師未嘗不往來乎其間寒食日作春遊詩一首其一云十頃
方池間御園森森松栢罩清煙亭臺萬事都歸夢花柳三春卻
屬仙島外更無清絕地人間唯有廣寒天深知造物安排定乞

道藏輯要

西遊記

三

胃集三

×××××

與官民種福田其二云清明時節杏花開萬戶千門日往來島
外茫茫春水闊松間獵獵暖風迴遊人共嘆斜陽逼達士猶嗟
短景催安得大丹冥換骨化身飛上鬱羅臺乙酉四月宣撫王
公巨川請師致齋於其第公關右人也因語咸陽終南竹木之
勝請師看庭竹師曰此竹殊秀兵火而後葢不可多得也我昔
居於磻溪茂林修竹眞天下之奇觀也思之如夢今老矣歸期
將至當分我數十竿植寶玄之北軒聊以遮眼宣撫曰天下兵
革未息民甚倒懸主上方會師重道賴師眞道力保護生靈何
遽出此言邪願垂大慈以救世爲念師以杖叩地笑而言曰天
命已定由人乎哉眾莫測其意夏五月終師登壽樂山巔四顧

園林若張翠幄行者休息其下不知暑氣之甚也因賦五言律
詩云地土臨邊塞城池歷古今雖多壞宮闕尙有好園林綠樹
攢攢密清風陣陣深日遊仙島上高視入絃吟一日師自瓊島
迴陳公秀玉來見師出示七言律詩云蒼山突兀倚天孤翠柏
陰森遶殿扶萬頃煙霞常自有一川風月等閑無喬松挺拔來
深澗異石嵌空出太湖盡是長生閑活計修真薦福邁京都九
月初吉宣撫王公以榮感犯尾宿主燕境災將請師作醮問所
費幾何師曰一物失所猶懷不忍況闔境乎比年已來民苦徵
役公私交罄我當以觀中常住物給之但令京官齋戒以待行
禮足矣餘無所用也於是約作醮兩晝夜師不憚其老親禱於
玄壇醮竟之夕宣撫喜而賀之曰榮感已退數舍我輩無復憂
矣師之德感一何速哉師曰余有何德所禱之事自古有之但
恐不誠耳古人曰至誠動天地此之謂也重九日遠方道眾咸
集或以菊爲獻師作詞一闋寓聲憾歡遲云一種靈苗體性殊
待秋風冷透根株散花開百億黃金嫩照天地清虛九日持來
滿座隔坐中觀眼界如如類長生久視無凋謝稱作伴閑居繼
而有奉道者持蠶紙大軸來求親筆以鳳樓精詞書之云得好
休來休便是贏取逍遙免把身心使多少聰明英烈士忙忙虛
負平生志造物推移無定止昨日歌歡今日愁煩至今日不知
明日事區區著甚勞神思一日或有質是非於其前者師但漠

道藏輯要

西遊記

三

胃集三
×××支州

然不應以道義釋之復示之以頌曰拂拂拂盡心頭無一物
無物心頭是好人好人便是神仙佛其人聞之自愧而退丙戌
正月盤山請師黃籙醮三晝夜是日天氣晴霽人心悅懌寒谷
生春將事之夕以詩示眾云詰曲亂山深山高快客心羣峰爭
挺拔巨壑太蕭森似有飛仙過殊無宿鳥吟黃冠三日醮素服
萬家臨五月京師大旱農不下種人以爲憂有司移市立壇懇
禱前後數旬無應行省差官賚疏請師爲祈雨醮三日兩夜當
設醮請聖之夕雲氣四合斯須雨降自夜半及食時未止行省
委官奉香火來謝曰京師久旱四野欲然五穀未種民不聊生
賴我師道力感通上真以降甘澍百姓僉曰神仙雨也師答曰

道藏輯要

西遊記

三

胃集三
卷之文

相公至誠所感上聖垂慈以活生靈吾何與焉使者出復遣使
來告曰雨則旣降奈久旱未霑足何更得滂沱大作此旱可解
願我師慈悲師曰無慮人以至誠感上真上真必以誠報人大
雨必至齋未竟雨勢海立是歲有秋名公碩儒皆以詩來賀一
日有吳大卿德明者以四絕句來上師復次韻答之其一云燕
國蟾公卽此州超凡入聖洞賓儔一時鶴駕歸蓬島萬劫仙鄉
出土邱其二云我本深山獨自居誰知天下眾人譽軒轅道士
來相訪不解言談世俗書其三云莫把閑人作等閑閑人無欲
近仙班不於此日開心地更待何時到寶山其四云混沌開基
得自然靈明翻小大椿年出生入死常無我跨古騰今自在仙

又題支仲元畫得一元保玄素三仙圖云得道真仙世莫窮三
師何代顯靈蹤直教御府相傳授閱向人間類赤松又奉道者
求頌以七言絕句示之云朝昏忽忽急相催暗換浮生兩鬢絲
造物戲人俱是夢是非嚮日又何爲師自受行省已下厭官疏
以來憫天長之聖位殿閣常住堂宇皆上頹下圯至於窻戶堦
砌毀撤殆盡乃命其徒日益修葺罅漏者補之傾斜者正之斷
手於丙戌皆一新之又創修寮舍四十餘間不假外緣皆常住
自給也凡遇夏月令諸齋舍不張燈至季秋稍親之所以預火
備也十月下寶玄居方壺每夕召眾師德以次坐高談清論或
通宵不寐仲冬十有二日夜半振衣而起步於中庭旣還坐以

道藏輯要

西遊記

三

胃集三
大日文川

五言律詩示眾云萬象彌天闊三更坐地勞參橫西嶺下斗轉
北辰高大勢無由過長空不可韜循環誰主宰億劫自堅牢丁
亥自春及夏又早有司祈禱屢矣少不獲應京師奉道會眾一
日請師爲祈雨醮旣而消災等會亦請作醮師徐謂曰我方留
意醮事公等亦建此議所謂好事不約而同也公等兩家但當
懇勸遂約以五月一日爲祈雨醮初二日爲賀雨醮三日中有
雨是名瑞應雨過三日雖得非醮家雨也或曰天意未易度師
對眾出是語萬一失期能無招小人之訾邪師曰非爾所知也
及醮竟日雨乃作翌日盈尺越三日四天廓清以終謝雨醮事
果如其言時暑氣煩燠元帥張資亂者請師遊西山再四過勤

師赴之翌日齋罷雨後遊東山庵師與客坐於林間日夕將還以絕句示眾云西山爽氣清過雨白雲輕有客林間坐無心道自成既還元帥第樓居數日來聽道話者竟夕不寐又應大谷庵請次日清夢庵請其夕大雨自北來雷電怒合東西震耀師曰此道之用也得道之人威光烜赫無乎不在雷電莫能匹也夜深客散師偃息草堂須臾風雨駭至怒霆一震窗戶幾裂少焉收聲人皆異之或曰霹靂當滂至何一舉而息邪有應者曰無乃至人在茲雷師爲之霽威乎既還五月二十有五日常道人王志明至自秦州傳旨改北宮仙島爲萬安宮天長觀爲長春宮語天下出家善人皆隸焉且賜以金虎牌道家事一仰神仙

道藏輯要

西遊記

三

胃集三
XOL-1

處置小暑後大雨屢至暑氣愈熾以七言詩示眾云溽暑熏天萬里遙洪波拍海大川潮嘉禾已見三秋熟旱魃仍聞五月消百姓共忻生有望三軍不待令方調實由道化行無外暗賜豐年助

聖朝白瓊島爲道院樵薪捕魚者絕迹數年園池中禽魚蕃育歲時遊人往來不絕齋餘師乘馬日凡一往六月二十有一日因疾不出浴於宮之東溪二十有三日人報已午間雷雨大作太液池之南岸崩裂水入東湖聲聞數十里鼉鼉魚鼉盡去池遂枯涸北口山亦摧師聞之初無言良久笑曰山摧池枯吾將與之俱乎七月四日師謂門人曰昔丹陽營長記於余云吾沒

之後教門當大興四方往往化爲道鄉公正當其時也道院皆勅賜名額又當住持大宮觀仍有使者佩符乘傳勾當教門事此時乃公功成名遂歸休之時也丹陽之言一一皆驗若合符契况教門中勾當人內外悉具吾歸無遺憾矣師既示疾於寶玄一日數如偃中門弟子止之師曰吾不欲勞人汝等猶有分別在且偃寢奚異哉七月七日門人復請曰每日齋會善人甚眾願垂大慈還堂上以慰瞻禮師曰我九日上堂去也是日午後留頌云生死朝昏事一般幻泡出没水長閑微光見處跳烏兔玄量開時納海山揮斥八紘如咫尺吹噓萬有似機關狂辭落筆成塵垢寄在時人妄聽聞遂登葆光堂歸真焉異香滿室

道藏輯要

西遊記

卷

胃集三

XO文川

門人捻香拜別眾欲哭臨侍者張志素武志攄等遽止眾曰真人適有遺語令門人宋道安提舉教門事尹志平副之張志松又其次王志明依舊勾當宋德方李志常等同議教門事遂復舉似遺世頌畢提舉宋道安等再拜而受黎明具麻服行喪禮奔走赴喪者萬計宣差劉仲祿聞之愕然歎曰真人朝見以來君臣道合離闕之後上意眷慕未嘗少忘今師既昇去速當奏聞首七之後四方道俗遠來赴喪哀慟如喪考妣於是求訓法名者日益多一日提舉宋公謂志常曰今月上七日公暨我同受師旨法名等事爾其代書止用吾手字印此事已行姑訟襲之繼而清和大師尹公至自德興行祀事既終七提舉宋公謂

清和曰吾老矣不能維持教門君可代我領之也讓至於再清和受其託遠邇奉道會中善眾不減往昔戊子春三月朔清和建議爲師構堂於白雲觀或曰工力浩大糧儲鮮少恐難成功清和曰凡事要人前思夫眾可與樂成不可與慮始但事不思已教門竭力何爲而不辦況先師遺德在人四方孰不瞻仰可不勞行化自有人贊助此緣公等勿疑更或不然常佳之物費用淨盡各操一瓢乃所願也宣差便宜劉公聞而喜之力贊其事遂舉鞠志圓等董其役自四月上丁除地建址歷戊己庚俄有平陽太原堅代蔚應等羣道人二百餘資糧助力肯構是堂四旬告成其間同結茲緣者不能備紀議者以爲締構之勤雖

道藏輯要

西遊記

竟

胃集三

卷之三

由人力亦聖賢陰有以扶持也期以七月九日大葬仙師六月間霖雨不止皆慮有妨葬事既七月初吉遽報晴霽人心翕然和悅前一日將事之初乃炷香設席以嚴其祀及啟柩師容色儼然如生遠近王官士庶僧尼善眾觀者凡三日目萬人皆以手加額嘆其神異焉繼而喧播四方傾心歸嚮來奉香火者不可勝計本宮建奉安道場三晝夜預告齋旬日八日辰時玄鶴自西南來尋有白鶴繼至人皆仰而異之九日子時後設靈寶清醮三百六十分位醮禮終藏仙蛻於堂異香芬馥移時不散臨午致齋黃冠羽服與坐者數千人奉道之眾又復萬餘既盥神翌日大雨復降人皆嘆曰天道人事上下和應了此一大事

非我師道德純備通於天地達於神明疇克如是乎諒非人力所能致也權省宣撫王公巨川咸陽巨族也素慕玄風近歲又與父師相會於燕雅懷昭映道同氣合尊仰之誠更甚疇昔故會茲葬事自爲主盟京城內外屯以甲兵備其不虞罷散之日畧無驚擾於是親榜其堂曰處順其觀曰白雲焉師爲文未始起稿臨紙肆筆而成後復有求者或輒自增損故兩存之嘗夜話謂門弟子曰古之得道人見於書傳者畧而不博失其傳者可勝言哉余屢對汝眾舉近世得道之士皆耳目所親接者其行事甚詳其談道甚明暇日當集全真大傳以貽後人師旣沒雖嘗口傳其概而後之學者尙未見其成書惜哉

道藏輯要

西遊記

翠

胃集三
小引上

王一天師清微弟子
道教學術